

Sraith Pictiúr 16 - Tine sa teach

Gníomhaíocht 1 – bí ag éisteacht, scríobh agus ag caint:

- Féach ar bhosca 1 san fhíseán thuas agus éist leis an gcur síos air dhá/trí bhabhta.
- Déan iarracht an méid a chloiseann tú a scríobh síos. (Mura bhfuil tú in ann abairtí iomlána a scríobh is leor eochairfhocail agus frásaí).
- Déan an méid atá scríofa agat a roinnt/a phlé leis an duine in aice leat. An bhfuil sibh in ann teacht ar an gcur síos iomlán?
- Éist leis an gcur síos arís.

Gníomhaíocht 2 – líon na bearnaí:

- Féach ar bhoscaí 2 agus 3 san fhíseán.
- Thíos tá cur síos ar bhoscaí 2 agus 3. Déan iarracht na bearnaí a líonadh.

2) Bhí Sailí _____ tnáite ach bhí ocras an _____ uirthi.
_____ sí roinnt sceallóga a dhéanamh.

Chuir sí ola ag téamh ar an _____.

3) Shín Sailí siar agus _____ go raibh sí ina _____.

Bhí _____ déanta aici ar na sceallóga.

I bpreabadh na _____, bhí an sásan ola _____ trí thine.

- Déan do chuid freagraí a roinnt/a phlé leis an duine in aice leat.
- Éist leis an gcur síos ar bhoscaí 2 agus 3.

Gníomhaíocht 3 – cuir in ord:

- Thíos tá cur síos ar bhoscaí 4 agus 5 ón bhfíseán, ach níl na habairtí san ord ceart. An féidir leat iad a chur san ord ceart?

D'éirigh leo an tine a mhúchadh.

Tógadh Sailí chuig an otharcarr ar shínteán.

Baineadh geit uafásach astu.

Tháinig an bhriogáid dóiteáin ar an bpointe.

Chuir an t-athair fios ar na seirbhísí éigeandála láithreach bonn.

Lig tuistí Shailí osna faoisimh.

Dúradh leo go mbeadh sí ceart go leor.

Bhí an seomra chomh dubh le pic.


Dhúisigh a máthair Sailí.

Dhúisigh an deatach tuismitheoirí Shailí.

- Déan do fhreagra a roinnt/a phlé leis an duine in aice leat.
- Éist leis an gcur síos ar bhoscaí 4 agus 5.

Gníomhaíocht 4- bí ag scríobh agus ag caint :

- Déan iarracht cúig líne a scríobh ag déanamh cur síos ar bhosca 6 san fhíseán.
- Tá roinnt focal/nathanna sa liosta thíos le cabhrú leat.
- Déan iarracht focail/nathanna/briathra eile a aimsiú ar www.focloir.ie nó www.teanglann.ie.



Gníomhaíocht 5 – bí ag léamh:

- Léigh an cur síos thíos ar an tSraith Pictiúr.

Gníomhaíocht 6 – bí ag éisteacht:

- Éist leis an gcur síos iomlán ar an tSraith Pictiúr.
- Ag an am céanna, más maith leat, breathnaigh ar théacs an fhíseáin, atá ag bun an leathanaigh seo.

Gníomhaíocht 7 – ciorcal comhrá:

- Ag úsáid na nótaí (ach gan a bheith á léamh), déan cur síos ar thrí cinn de na boscaí don duine in aice leat. Ansin déanfaidh sé sin cur síos ar na trí bhosca eile. Is féidir seo a dhéanamh cúpla uair le páirtnéirí difriúla.
- Cuir roinnt de na ceisteanna, atá ag bun an leathanaigh seo, faoi ‘Ceisteanna don Idirghníomhaíocht’, ar a chéile.
- Déan iarracht ceisteanna nua a chumadh.

Gníomhaíocht 8 – deis taifeadta:

- Déan tú féin a thaifeadadh ag déanamh cur síos ar an tSraith Pictiúr.
- Éist leis an taifeadadh atá déanta ag daoine eile.

Gníomhaíocht 9 – nathanna cainte: bí ag caint agus ag scríobh:

- Tá go leor nathanna cainte/focail úsáideacha sa téacs thíos. Déan iarracht cuid acu a chur in abairt ó bhéal leis an duine in aice leat.
- Déan iarracht cuid eile acu a chur in abairt scríofa.
- Mura dtuigeann tú céard is brí le nath cainte, cuardaigh é ar www.focloir.ie agus www.teanglann.ie.

Gníomhaíocht 10 – céard fút féin?

- Déan cur síos ar timpiste go bhfaca tú nó gur chuala tú faoi. Déan ceann a cheapadh más gá.
- Déan iarracht cuid de na nathanna sa téacs thíos a úsáid.
- Déan focail agus briathra nua a chuardach ar www.focloir.ie agus www.teanglann.ie.
- Nodanna/Feidhmeanna Teanga:
Tabhair cur síos ar an eachtra, cuir eagla agus iontas in iúl, déan cabhair a iarraidh, tabhair comhairle de shaghas éigin, tabhair rabhadh.
- Déan an méid atá scríofa agat a roinnt leis an duine in aice leat.
- Arís is féidir tú féin a thaifeadh.

Tine sa teach

(Téacs an fhíseáin)

- 1) Mí Eanáir seo caite d'fhreastail Sailí ar dhioscó i lár na cathrach. Chríochnaigh an dioscó ag mean oíche agus shiúil Sailí abhaile.

Bhí brat sneachta ar an talamh agus bhí sí préachta leis an bhfuacht. Nuair a shroich sí an teach, las sí an tine agus níorbh fhada go raibh sí te teolaí.

- 2) Bhí Sailí tuirseach, traochta, tnáite ach bhí ocras an domhain uirthi. Bheartaigh sí roinnt sceallóga a dhéanamh.

Chuir sí ola ag téamh ar an gcócaireán.

- 3) Shín Sailí siar agus níorbh fhada go raibh sí ina cnap codlata.

Bhí dearmad glan déanta aici ar na sceallóga.

I bpreabadh na súl, bhí an sáspan ola imithe trí thine.

- 4) Dhúisigh an deatach tuismitheoirí Shailí.

Baineadh geit uafásach astu.

Bhí an seomra chomh dubh le pic.

Chuir an t-athair fios ar na seirbhísí éigeandála láithreach bonn.

Dhúisigh a máthair Sailí.

- 5) Tháinig an bhriogáid dóiteáin ar an bpointe.

D'éirigh leo an tine a mhúchadh.

Lig tuisití Shailí osna faoisimh.

Tógadh Sailí chuig an otharcarr ar shínteán.

Dúradh leo go mbeadh sí ceart go leor.

- 6) An mhaidin dár gcionn, bhí damáiste na tine le feiceáil.

Bhí an teach ina phraiseach.

Thuig na tuismitheoirí go raibh an t-ádh dearg leo a gcosa a thabhairt leo ón tine.

Bhí Sailí ag teacht chuici féin san ospidéal.

Moladh di é a thógáil go bog ar feadh cúpla lá.

Ceisteanna don Idirghníomhaíocht:

- Cá raibh an cailín i mBosca 1?
- Cé air a ghlaoigh an fear i mBosca 4?
- Cé atá le feiceáil i mBosca 6? An raibh fearg ar na tuismitheoirí, meas tú?